

**INATSIARTUT
OMBUDSMANDIATA
UKIUMOORTUMIK
NALUNAARUTAA
2007**

3-18 *Sulianik akiliisitsiniarnermut tunngasunik misissuineq - akiligassiissutinik*

nassuiaasersuisarneq (j.nr. 11.73.88.73/040-07)

K Kommunit 2007-imi tikeraarninnut atatillugu kommunimi suliat akiliisitsiniarnermut tunngasut misissorpakka. Tamanna allakkani 31. maj 2007-imeersuni ilaatigut imaattunik oqaaseqaateqarnissannut pissutissaqalersitsivoq:

"Mappit allagaatinik imallit ilarpassuini allagaatit ilaapput, taakkunanilu aningaasat akilernerqartussanngorsimasut "assigiinnngitsut"-nik imaluunniit "akiligassiissutit assigiinnngitsut"-nik taaneqartarsimallutik.

Kommuni kommunimi innuttaasunut saaffiginnittunut suliaasat suliarineqartarnerat pillugu inatsit tunngavigalugu ilitsersuinissaminut pisussaaffeqarpoq, kommunili in-

⁴ John Vogterip atuakkiaani "Forvaltningslov med kommentarer"-mi, pingajussaaniq naqitertinneqartumi, Jurist- og Økonomforbundets Forlag, 1999, qupperneq 571

*nuttaasunut attaveqarfiginnikkaangami innuttaasunut ilitersuinissaminut ingerlatsi-
nermi ileqqorissaarneq tunngavigalugu aamma pisussaaffeqarpoq.*

*Akiligassiissutit sumut matussutissaanerit erseqqissumik takussallugu innuttaasoq pe-
riarfissaqartussaavoq, taamaalilluni innuttaasoq akiligassiissut isumaqatiginngikku-
niuk taanna pillugu naammagittaalliuuteqarnissaminut periarfissaqarsinnaaqqullu-
gu.*

*Akiliisitsiniarnermi akileeqqusillunilu nukingisaaruteqarnerni aningaasat suussusian-
nik, amerlassusiannik ullormillu akilerneqarsimaffissaannik tamatumunnga peqatigi-
tillugu oqaatigininneq akiliisitsiniartarfiup kingusinnerusukkut pinngitsaaliilluni qa-
noq akiliisitsiniarnissaanut pingaaruteqarsinnaavoq.*

*Taamaattumik inassuteqaatigaara akiliisitsiniartarfik akiligassiissutini akilerneqar-
tussannorsimasunik akiliisitsiniarluni nassiussigaangami aningaasat akilerneqartus-
sannorsimasut sunut matussutissaanerit erseqqissartassagaa.*

*Kommuni qinnuigaara qulaani taaneqartut kommunip qanoq iliuuseqarnissaanut pis-
sutissaqalersitsinerat pillugu oqaaseqaatinik saqqummiusseqqullugu."*

K Kommuni allakkatigut 9. juli 2007-imeersutigut imatut akivoq:

"(...)

"Akiligassiissutit assigiinngitsut"-nik suussusilikkat aningaasanut assigiinngitsunut tunngatitaap-
put, assersuutigalugu atuakkanik atorniartarfimmit atorsimasut utertinngitsuugaannut akiligassat,
akissarsiat amerlanaarlugit tunniunneqartut il.il.

Akiligassiissutit taamaattut tamarmik akiitsulinnut allagartalerlugit (fakturalerlugit) nassiunne-
qartarput, taakkulu "akiligassiissutit assigiinngitsut"-nut kingusinnerusukkut ilanngunneqartar-
lutik.

Suliami matumani K Kommuni annertunerusumik iliuuseqalersaanngilaq." (Atorfeqarfimmi
nutsigaavoq)

K Kommunimut 23. juli 2007-imi imatut allappunga:

"Aningaasat akilerneqartussannorsimasut pillugit kommunip akissutaa tusaatissat tiguara, taa-
maattumillu tamatumunnga atatillugu annertunerusumik iliuuseqaqqissananga."